

بِسْمِ اللَّهِ الرَّحْمَنِ الرَّحِيمِ

# KHUTBA JUMMAH

HAZRAT MUHYI-UD-DIN AL-KHALIFATULLAH

*Munir Ahmad Azim*

11 Décembre 2015 ~

(28 Safar 1437 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite fer deuxième partie de so Khutba Jummah lors « Mauvais L'Effet Télévision »:**

## MAUVAIS L'EFFET TÉLÉVISION

Par la grâce d'Allah azordi, c'est Allah même ki donne moi sa *Tawfiq* là pou mo continuer sa 2<sup>ème</sup> partie de mo Khutba Jummah lors '*Mauvais L'Effet Télévision*'.

À travers TV, l'habillement Islamique fine enlever à tel point ki ena considère sa l'habillement là comme l'habillement de bane ki pas civiliser, ou bien ki c'est l'habillement l'époque mangoze.

L'Islam fine mette grand restriction en céki concerne la sexualité, afin ki la vie sociale de nous communauté reste propre, loin de la prostitution, l'homosexualité et encore bane les autres maladies sociales. Quant à TV, li pas juste enlève sa restriction là, à travers so bane film malpropre ki li projeter là, mais li même incite bane jeunes pou satisfaire zot passion sexuel et immorale dans ene façon *Haraam*.

L'Islam c'est ene religion ki fine enseigne bane musulmans, bane madames aussi bien ki bane missiés pou cultive la honte dans zot, parceki c'est ene qualité ki aide cultive le respect mutuel. Le Saint Prophète (saws) fine même faire nous conner ki Allah (swt) fine joindre la honte (*Haya*) ensemble avec *Imaan* (la foi). Aussi longtemps ki ene dimoune ena la honte, so Imaan pou vivant, et ene fois ki li perdi la honte, li perdi so Imaan, et alors li commence azir couma bane zaimo. Quant à TV, à travers so bane senne indécents et obscènes ki li présente à bane dimoune, li fine enlève la honte depuis sa communauté là.

Longtemps ene ti fille musulmane parfois ti pé honté pou présente devant ene *mahram* avec la tête découvert. Mais astère, li content pou laisse bane étrangers admire li et l'heure là même li pou change so façon marcher, causer, li pou casse-casser devant bane étrangers là. Longtemps ene ti fille musulmane ti pé vine rouge si so *horni* fine sorti lors so la tête et fine découvert so l'estomac. Mais astère, li trouve li normal pou sorti en dehors so la caze avec ene boute la toile transparent, ki péna ene *horni* lors so la tête, ni ene *thusse*. Bane madames mariée trouvé ki pas ena narien là dans si gramatin zot alle boulangerie avec zot robe de chambre, et aussi pou balyer devant la porte et lave terrasse avec sa linge là.

En céki concerne bane collégiennes musulmanes, ena pé sorti la caze avec *hijab* et long coat lors zot devant parent, mais avant arrive lors Bus-stop, zot fini tire coat et *hijab*, mette dans sac. Sa bane collégiennes là pas capave expliqué ki zot faire dans bus, collège, leçons, jardins et dans stade jour Sports Day ! Et pas ena doute ki si bane madames mariée pé azir coumsa, couma mo fine dire, la honte sa, et bane ti fille musulmanes pé agir dans ene façon pareille, c'est parce ki bane zommes ki ena dans la caze fine perdi dignité zommes ! Eski nous encore capave considère sa bane dimounes là comme bane zommes, kan zot pé laisse zot bane madames et zot ti fille admire bane films ki péna *haya* (pudeur). Eski sa bane zommes sa, ki pas oulé laisse zot madames habiller mette *burqa*, mais plito mette bane robe ki ene coté ou bien deux coté fane et envie zot tiffille mette T-shirt et pantalons Jeans ?! Sa kalité zomme là capave appelle zot mari ou papa sa ? Donc avec télévision pas juste la honte fine enlever, mais même la féminité fine être enlever dans nous bane ti fille, et comme résultat ene musulman gagne problème dans ménage parceki au lieu ki ene garçon vivre avec ene ti fille, li trouvé ki li pé vivre avec ene garçon couma li même.

L'Islam c'est ene religion ki demande nous pou être conscient de raison pour lequel Allah fine envoye nous lors la terre, afin ki sa aide nous pou vivre dans l'obéissance Allah. Azordi jour avec sa bane kalité chanter et la musique indécent ki ena là, kot bane jeunes pé écoute sa et zot pé commence danser zot aussi, sa pé gâte zot complètement. Zot pé suivre sa bane tendances là et danse bane danser indécent kot sa c'est ene facteur principe ki zot fine oublier réalité de zot l'existence lors la terre, et pou ki but Allah (swt) fine crée zot. Quant à TV, tous so bane programme ki li présenter c'est bane jeunes ki plonger là-dans complètement, kot zot l'esprit entre temps pé faire bane imagination ki pas nécessaire explique ou.

Maintenant nous trouve nous bane jeunes pas juste fine gagne acteur/actrice préférer, mais fine gagne chanteur/chanteuse préférer ki appelle zot bane '*Stars*'. Ou trouve sa bane chanteur/chanteuse là fine rentre dans le cœur de nous bane jeunes. Kot sa bane jeunes là ti pé bizin récite Coran par cœur et surtout dans bane moment libres, zot pé chante bane chanter là par cœur et zot montrer zot intéressant à travers sa kitchose là. Ena même alle prend part dans bane compétition chanter et zot fine arrive ene stage pou dire ki zot pas pou capave vivre sans chanter, danser et la musique.

L'Islam fine enseigne nous pou baisse nous regard afin ki nous préserve nous le cœur contre bane mauvais pensées. Plus ene musulman baisse so regard, plus li jouir d'ene tranquillité dans so le cœur. Coumsa même, plus li admire beauté bane acteur/actrice lors l'écran, sa plus provoque so désire pou désobéir Allah. Quant à TV, couma ou capave guette télévision si ou baisse ou regard ?

Donc TV entraîne ou et ou zenfant pou admire l'indécence et l'immoralité lors l'écran. L'Islam pas fine juste ordonne nous pou faire 5 fois *Salaat* par jour, mais li fine aussi ordonne nous pou faire sa 5 fois *Salaat* là dans l'heure en *Jamaat* (congrégation) dans masjid.

Quant à TV, si li pas fine réussi faire ou quite *Salaat* au complet, au moins li pou réussi faire ou pas alle *masjid* et pas faire li dans so l'heure ki bizin. Commié épisode ki zoué intentionnellement l'heure Namaz, afin ki bane musulmans pas faire *Salaat* sa l'heure là ? Commié musulmans pou l'amour ki zot ena pou football, zot pas vine masjid pou faire *Salaat* en congrégation? Commié musulmans reste guette télévision jusqu'à tard dans la nuit et ensuite pas lever pou *Fajr* ? Si là aussi ou le cœur pas mort, bé kan li pou mort ? L'Islam fine enseigne nous pou pense Allah boucou afin ki sa garde nous le cœur vivant.

Quant à TV, li pas juste empêche ou faire *Zikrullah* pendant ki ou pé guette télévision, mais li même empêche ou pense Allah tous les temps. Dans la journée, ou pé pense ki programme ou fine guetter hier soir, et ki film pé attane ou azordi soir. Kan zot pé guette sa bane film là, tellement zot plonger là dans, même ou cause avec zot, zot pas tender, tellement zot pé concentré. Guette 'mauvais l'effet télévision' kot pé amène nous bane jeunes de nos jours et mo sure kan zot joine zot camarade zot pou cause film même et si arriver zot camarade pas fine guette tel ou tel film zot pou recommande li, faire ene démarche guette sa film là et li pou commence donne ene explication de sa film là et a part guette film lors télévision, zot alle louer aussi bane films lors VCD ou DVD pou guetter.

Zot fine transforme zot la caze en ene cinéma kot péna *Barakat* di tout. Zot fine perdu *Barakat* d'Allah. Ena la caze ki pas tane lire Coran Sharif, ni lire bane Namaz Nafil. Péna zikr, péna bane parole lors l'enseignement de l'Islam et céki le Saint Prophète (saws) fine enseigne nous. Même sa bane parents là aussi pas pou encourage zot bane zenfants pou étudier l'Islam, ou pou alle dans bane programme ki ena dans masjid, et pou écoute bane parole d'Allah et même zot pas dur envers zot zenfant pou faire zot lever gramatin bonheur pou faire le Namaz Tahajjud et faire boucou doah. Après Tahajjud, l'heure là ena Namaz Fajr. Sa bane kalité parents là pas encourage zot zenfants pou consacrer zot dans sa bane Namaz obligatoires et Nafils là et zot pas conseille zot bane zenfants pou au moin tous les jours lire 2 Ruku dans Coran Sharif avec traduction.

Astère là sa parent là même pas attaché avec la spiritualité, et alors couma astère li pou faire so bane zenfants alle attache zot avec la spiritualité ? Pou li, si so zenfant fine gagne ene bon travail,

pé roule ene l'auto, l'argent pé rentre dans la caze, sa même ki compte, kante même li pé amène ene la vie l'immoralité, sa pas dire li narien, kan même so l'habillement pas Islamique, li indécent pas faire narien !

Malheur à sa bane kalité parents là ki pas fine conne guide zot bane zenfant lors le chemin droit. Zot aussi, zot responsable si zot bane zenfants fine prend ene tel mauvais chemin. Dès ki zot ti encore tipti, pas fine faire zot intéresser avec la spiritualité, pas fine faire zot faire zot 5 fois *Salaat* dans l'heure, lire Coran Sharif, faire Zikr, lire zot Kalima, duah, attributs d'Allah avant alle dormi. Pareil couma sa planteur là, si li fine plante ene pié, et pié là pé pousse travers, li laisse li pousse travers, abé tous so bane branches pou alle dans différent direction ki pas pou ena control. Par contre si li dresse pié là dépi tipti, pié là pou pousse droite, et li pou ena control lors so bane branches aussi dans ki direction li pé prend.

Donc, l'éducation de ou zenfant pas commence dans l'école, ni dans Madrassa ; li commence avec ou même. Ou même ki so premier professeur. Sa premier éducation là vine de coté ou même. Alors essaye comprend mo message ki mo pé donne ou et mo Khutba zordi aussi li pas terminer là même. *Insha Allah*, Allah donne moi le *Tawfiq* pou continuer mo 3<sup>ème</sup> partie Khutba lors le '*mauvais l'effet télévision*' semaine prochaine, *Insha Allah, Ameen*.

## INONDATIONS DANS CHENNAI

Bane premiers semaines de Novembre fine témoigne d'ene grand calamité dans Chennai – le plus grand inondation depuis ene siècle. La pluie torrentiel et aussi débordement de bane réservoirs fine inonde plusieurs parties de Chennai et sa bane la pluie là fine contigner aller même et sa fine fer ziska azordi (le 11 Décembre 2015) bane inondations extrême kot à peu près 280 dimounes fine trouve la mort et des milliers fine forcé pou quitte zot la caze ki fine fini dans sa bane inondations là. Dans sa bane moments de grand désolation là, la Jamaat Ul Sahih Al Islam et sa humble serviteur là nous deboute en prière pour bane victimes et bane ki fine bizin abandonne zot bane la cazes, et nous invoque Allah pou retire toutes trace de sa désolation là et pardonne tous bane habitants là-bas et béni zot et zot bane zenfants avec ene future meilleure, dans l'obéissance d'Allah. *Insha-Allah*.